

此性則名佛性若見此性卽超佛地豈千生萬死之義乎十四祖龍樹云佛性非大非小非廣非狹無福無報不死不生所以悟我性無生死見我性無地獄修我性超乎造化之外也

見性成道

上陽子曰威音王已前這一段公案不在左右不在偏傍不在中不在外當其時也旣無師匠又無宗旨七佛俱未出世彌勒尙未下生此一大事出模走樣照天灼地哆哆和和之後佛已在世人人具足箇箇分明了也爾來到今而一切世人將自己的撇了尋問他人且道他家底事豈容你知猶你家下之事容他知否所賴先哲慈悲開示祖祖單提達磨大師直指人心見性成佛則太過了豈惟後人愈行愈遠總將日用現前一切不問卻乃千思萬想向那邊覓而欲見性成佛此輩可深惜乎豈比天人師明星出時成佛了也弟子再拜稽顙問曰傳云釋迦生下周行七步一手指天一手指地曰天上地下惟我獨尊若是則世尊生而知之者也上陽子哂之曰非也曰敢問所以曰釋迦文佛師瞿曇乃得金丹之道修之而證佛也以其修金丹而成仙故曰金仙蓋金丹者二八兩弦之炁也二八合成一十六兩故曰丈六金身世豈有天生自然之釋迦者乎曰惟我獨尊後從何來曰此佛法之謂也曰敢問所以曰後之佛祖將此語題以爲公案因謂之佛法使後之學人蘊利根七智者以此

公案常提常拈照破自己腳跟踏實而明心焉而見性焉轉相
悟人因之仍之佛祖既出各呈面目形容益多語殊意合是以
非理可釋思意不得或以小而喻大或以賤而比貴不涉程途
難堪訓誨大根器識一見了然明白更不驚疑直下承當有何
言句下士愚人思故不能得擬議又不是只得妄云此乃葛藤
之語也若有問其如何謂之葛藤則謬云卽禪機也如此宛轉
支離卻不究竟佛法實事所以葛藤禪機之語者乃齒外之浮
辭而爲佛法之喻也唯大智慧底則去口頭之虛論而見其佛
法之真實也下愚之人誑談鋒辯至有公案非理可釋去處則
云禪機也彼以禪機爲辭之屬我如百尺竿頭不復可進又安

道藏輯要

金丹大要

主

易集二

卷八

知有佛法哉弟子進曰佛法者世尊以靈驗而示人乎抑以天
龍護衛之神而見之乎曰皆非也此乃常人所談之佛法也今
夫生死禍福影響靈驗幽冥報對浮辭彰虛以示於人者此之
謂常人之佛法也若真實佛法唯靈於已倏忽廣大變通須臾
而復自在乃能過人之過而亦自知其過此爲真實佛法也蓋
真實佛法聖凡不敢一窺况可以示人乎若真實佛法則諸天
捧花無路外魔潛視不得况云天龍見之乎曰如此佛法之大
唯世尊能有也曰世尊已有佛法唯人有佛法曰人之佛法復
在何處曰掛向太虛壁立萬仞視之不見聽之不聞曰有靈驗
否曰顯大神通霍大法雨撐天拄地作佛成仙古今專生殺之

權頃刻有感通之變是十翼曰寂然不動感而遂通故鬼神不敢視邪怪不能憑所以破竈墮曰本是泥土合成靈從何來聖從何起諦觀此語豈非大靈驗乎曰何者是人之佛法曰人以性爲佛法曰旣以性爲佛法則諸佛祖一切常人皆以見性而成佛是不必於金丹之道也曰否曰何謂也曰一切常人且不知性爲何物而暇言金丹之道乎曰一切常人唯不知性而諸佛祖是見性而成佛曰否曰請問其義曰子不知夫達磨之說乎昔者達磨西來不立文字唯直指人心見性成佛因有其道也蓋道之一事不可得而形容思議者也如之何可以立文字且人心不可得而聞見者也如之何用直指人之性卽真佛者

道藏輯要

金丹大要

圭

易集三

也如之何得見而成乎此卽老子觀妙之道也是以達磨下功於長蘆隱於少林修煉是云金丹之旨卽達磨直指之旨卽釋迦獨尊之旨卽迦葉正法眼藏涅槃妙心之旨卽馬祖非心非佛非物之旨卽六祖共永嘉無生無速之旨卽龐居士悟一口吸盡西江水之旨卽藥山一物不爲顯之旨卽丹霞燒木佛之旨卽石鞏弓箭之旨卽趙州蘿蔔柏樹子喫茶之旨卽歸宗先天爲心祖之旨以至山河大地拄杖刹竿棒喝露柱燈籠佛殿山門庫堂金剛王寶劍洞山麻三斤石霜百尺竿頭俱胝指頭禪黃龍赤斑蛇烏窠吹布毛法燈天真佛法眼透聲色思和尚米價遵布衲浴佛僧奚仲造車孚上座搖扇雪峯輓毬雲門胡

餅鹽官扇子青平搬土瀉山水牯禾山打鼓秘魔持父香巖擊
竹首山竹篋仰山拂子以至頂明拳肘眉眼鼻尖米粟絲毫釘
鞋木履清風明月曉鍾畫角芥子須彌圈蓬漆桶銀山鐵壁葛
藤寒松黃花翠竹枯椿乾櫟古澗寒泉源頭路口翅鳥獅兒大
雄猛虎牛車羊角狗子猫兒胡孫鼯鼠此等公案備難悉數莫
不皆是見性之旨也上陽子復謂弟子曰從上祖師做模打樣
百般遷就托物立名爲一切人指箇真實佛性之處然其各隨
方便而說謂之隨方結緣而一切人不到性地反爲多事如引
過河之網未提其綱若牽織金之花不編其綜吾今分明指出
了也似風雲雷雨驀然黑暗須臾散去紅日當空誰不見了恐
道藏輯要

金丹大要

圭

昂集三

卷八

你諸人以光明之眼如翳障了以知慧之性爲塵撲之一向弄
舌頭不顧損神氣是又不知是修又不知修如此蹉過走破腳
跟下皮肉賺到老來可惜了也比來說禪者明立高座聚眾問
答口頭活弄性地迷蒙橫以辯論敏捷爲能所以多記公案爲
明了人示以一指隨以二指應或而向下他卽擬上或云眼前
卽擬背後或轉腳跟他便走了似此捏僞那知真實此爲設辭
應敵豈能見性明心如與聾人覓物相似與之索蛤聾乃掬水
指令下鞍聾反勒馬指向腳下聾便拾芥雖云近傍不遠孰知
所差太多此乃聾人悟聽強猜者今一切人本皆聰識見物如
蔽若彼聾人強猜妄臆其中以語爲悟能有幾人不勉再爲諸

人各各見箇本來面目這回莫若又做箇朦朧底人也圓悟云
父母未生以前淨倮倮赤洒洒不立一絲毫及乎既生之後亦
淨倮倮赤洒洒地不立一絲毫佛祖慈悲興言至此欲爲世人
做箇指蹤極則而一切人旣聞此語便以倮倮洒洒爲伶俐快
活看卻不知倮倮洒洒卽本來面目也卽是性也且道旣生之
後倮倮洒洒不立一絲毫鈍根錯想而不明了亦無足怪何以
故此蓋常人而紐於常也且道云何父母未生以前亦云倮倮
洒洒不立絲毫此言特殺過則了利根之士卽於見前早辦一
箇人頭之處安有不明了我之說此者非但爲汝諸人提拈
起亦使叢林禪僧天下一切人誦此金丹大要究竟起曰釋義

道藏輯要

金丹大要

毒

易集三

卷八

如懸夾鏡相似人立其中若頂若足若背若面不必求人豈不
自見如今多少住禪刹者不知禪是何物領率二三百人或至
千百餘眾惟只頑坐禪杖夜巡湯睡者辱之日則限以規程何
暇見性夜則勞神廢寢安知真佛此謂一盲引眾盲也豈不聞
大慧云一種杜謨漢脚跟下不實只管教人攝心靜坐坐教絕
氣真可憐憫六祖又云長坐拘身是病非禪石霜諸禪師堂盈
千眾長坐如機識者呼爲眾木樛多三藏師於曹溪大鑒一日
見僧結庵而坐藏師前喚之曰我西域最下根者不墮此見馬
祖南嶽住庵日惟坐禪以求成佛讓禪師故將磚於庵前磨祖
云何爲曰磨磚作鏡祖云磨磚豈能成鏡讓曰然坐禪豈能成

佛馬祖頓悟言下得旨音玄妙妙因共雪峯論佛法峯云世界
潤一丈妙指火爐云潤多少峯云如石鏡潤妙云老和尚腳跟
未點地在從那到今有輩禪流因名行腳搖唇識解不知落處
走遍叢林踏破了草鞋不肯認他腳跟如之何是點地處佛祖
云大慈大悲指出禪名使人覺悟如東禪西禪南禪北禪圓通
禪廣佛禪圓覺禪騎佛禪無位禪如來禪祖師禪大方禪城市
禪腳跟禪龍女禪蚌殼禪老嫗禪新婦子禪一味禪指頭皮可
陋子禪口鼓子禪琉璃瓶子禪千名百樣惟要世人早自見性
今世衲僧以順寂入涅槃爲終世過化之獎辭是爲明眼人所
嗤甯不惶愧彼安得知涅槃之際是衲僧腳跟下求向上之事

道藏輯要

金丹大要

圭

易集三
X三X

也又稱僧名唯求下字何乃諱上而不諱下者乎內不認佛祖
欲人見性以下爲體人卻不知性是身中之物乃以性爲見解
智識猶認靈臺以爲心地不悟靈臺卽是性也世人孰肯若良
遂者哉良遂再見麻谷眼下見性瞞他不得出謂眾曰諸人知
處良遂總知良遂知處諸人不知爲他諸人或出或入向六根
門頭做盡顛倒良遂故云總知而良遂之所知者乃真佛也諸
人惟識得僞佛所以云良遂知處諸人不知也今爾諸人還知
得否時諸弟子罔知所措上陽子曰甚矣性之易見也信矣人
之難悟也汝來且道性命是汝自家底吾已擘破面皮爲汝說
了汝尙不知性爲何物命爲何事若不就汝心上體認去卻只

今語言文字裏話曾待將你舌頭嚥了爲甚干涉吾又再四與爾呈露無一肯認若待掀倒禪床則敗闕了今佛與汝討條活路做箇了也夫此一事不過是箇有爲法也昔者神人商容以有爲之法欲授老子乃先示以柔弱之道遂因吐舌老子卽悟曰舌柔齒剛此是有爲之法也夫有爲之法者須知甘露之門掣電之機故世尊云如夢幻泡影如露亦如電謂之有爲法也而一切人聞甘露掣電之說則謂露電是天上落來底夢則以爲睡中所見幻則以爲化凡易脆泡則以爲水上浮漚影則以爲因相而出皆非者也凡此皆是妄猜謬度不向分內以求真實也世尊是大聖人豈肯空言閒語無益者哉所說皆指實事

道藏輯要

金丹大要

集

鼎集三

令人各自見性其用意處言近指遠以大喻小上士聞之一言千悟一切常人任佛說到下稍反以爲禪機之語言也爾時眾中忽一弟子若脫了桶子底相似豁然大悟眼下見性驚喜過望卽前伏地稽首而言謝師慈憫開我愚迷指以非佛之說而說非法之法弟子萬劫千生遭逢如是羣疑妄想一切釋然猶暗燃炬內外洞明又如傍水觀影上下俱見真實而希有也上陽子知其根器不淺乃曰來汝所悟者是汝性也汝性非性汝心非心心卽是心性卽是性性非汝心心非汝性汝試爲我言汝實性應時答言弟子鄙見性卽云性心卽云心心無所心性無所性性亦非心心亦非性性非心心非性性無有心心無有

性性本無心心本無性性卽言性心則言心心若有性卽非佛
心性若有心卽明佛性佛性我性是真實性我心佛心是妄想
心心若妄想卽不見佛性若真實卽是真佛更乞我師慈悲開
顯真實妙義上陽子曰汝於佛法唯只八成吾今告汝兩下圓
滿名何云心有肉團心有虛空心此虛空心是名何心是金剛
心是涅槃心彼肉團心復名何心是妄想心是煩惱心是世人
思慮總皆執著以執著故是名障礙心有障礙因緣不來因此
無緣輪迴生死若金剛心若涅槃心是虛空心此虛空卽智慧
心卽真實心上士一聞發大智慧勇猛精進是云真佛此真佛
心是堅固心是成就心是圓滿心是真佛心是真人心此一切

道藏輯要

金丹大要

七

易集三
又八

心慙劫不壞彼一切心爭愛貪著見色迷戀聞聲驚怖是非分
別無有窮已此一切心凡所見聞如如不動霹靂大震如如不
動况彼聲色豈能搖動生死岸頭如如不動况彼水火豈能焚
漂如金剛劍有大精進如百尺竿直而不屈盡世甲兵無能摧
折此精進心有大猛勇諸天及人見此精進歡喜無量假此精
進成佛作祖云何名佛是虛空心云何虛空而名真佛此虛空
心懸崖壁立智慧精進倏爾變通因爾虛空前無所進後無所
退執著不得思議不及是云真佛亦云法身緣此法身住虛空
中得大解脫得大白在遍十方界廣大神通故云南無十方虛
空常住三寶離此三寶無法身離此法身卽不明了此法身外

更覓何心更覓何性若有所覓卽不見性爲不見性肉團心起
六賊煩擾世以此故猶夢中夢無有了期唯覺是了真佛之心
常如夢覺智慧靈明無有顛倒大修行人以此爲悟悟無不了
悟卽進修若大智慧心卽云佛若大悟了佛卽云心若大解脫
非心非佛若大因緣卽心卽佛此心卽性此性卽佛性佛不離
佛性明了上陽子曰性由自悟命待師傳演禪師云悟了須是
遇人悟了若不遇人十箇月有五雙杜撰子不聞盧惠能者乎
能是新州樵夫年已半百聞客誦經頓見佛性致母出鄉遠叩
黃梅五祖纔見數語投機使役春碓經八箇月因聞香偈始露
錐鋒大滿授之衣鉢佛法能得指歸又無法財乃得神會之貲
道藏輯要

金丹大要

夷

易集三

卷之三

又得劉志畧爲之外護遂隱於四會縣獵人之中而下功焉性
命雙修以土制鉛以鉛制汞汞歸金鼎卻入深山兀坐修養道
成之後潛抵番禺吐風旛之語以顯神通爲大宗師是與達磨
出處同風弟子問曰黃梅數百餘人其中豈無一人可授佛法
何乃直待惠能至而授之五祖乃若是乎曰五祖何幸早得人
傳若說是事豈惟數百人中而無一人昔者世尊靈山會上五
千退席且無一人爾道方今之時四海之廣其真得佛法者復
有幾人焉是之謂希有者也弟子思之再拜伏諾上陽子曰今
時修行的人安知得傳之後無量難苦方能就事其所云者與
世不同彼所謂樂此以爲懼此以爲得彼反爲失若人於此下

箇注腳是敢保他有著落處是謂神炁二用性命雙修者也若
只見性惟是則大鑒何必走黃梅永嘉何因走曹溪乎是以我
師趙真人曰坐禪入定一件在得牟尼之珠聖胎已成之後謂
之抱一守和知白守黑也謂之面壁端坐佛禪入定也謂之煉
形化氣也煉炁歸神也是名形神出胎親爲佛子已上事也故
本行集經云頓悟大乘正宗漸入虛無妙道大乘之道卽金丹
之道也所以達磨有云見此東土赤縣神州有大乘氣象成佛
無疑是載巨舟實以眾寶三周寒暑來求大乘之道是以達磨
始則見性得法而來終則得丹成佛而西歸是之謂直指人心
見性成佛者也時諸弟子皆得解悟再拜而退信受奉行

道藏輯要

金丹大要

堯

鼎集三
116X